

四庫全書

史部

欽定四庫全書

史部

文獻通考卷三百十一
三至

詳校官內閣學士臣瑞保

編修臣程嘉謨覆勘

覆校官中書臣孫希旦

校對官中書臣金光悌

謄錄監生臣周連元

欽定四庫全書

文獻通考卷三百十一

鄱陽馬一鵠臨貴與著

物異考十七

毛蟲之異

周穆王征犬戎得四白狼四白鹿以歸自是荒服者不
至

春秋莊公十七年冬多麋劉歆以為毛蟲之孽為災劉

向以為麋色青屬青祥麋之為言迷也蓋牝獸之淫者
時莊公將取齊之淫女天戒若曰勿取齊女淫而迷國
不悟卒取之其後淫于二叔慶父叔牙終皆誅死幾亡社稷

董仲舒指略同京房易傳曰廢正作淫大不明國多麋
漢昭帝時昌邑王賀聞人聲曰熊視而見大熊左右莫
見以問郎中龔遂遂曰熊山野之獸而來入宮室王獨
見之此天戒大王恐宮室將空危亡象也賀不改悟後
卒失國

後漢章帝建初七年獲白鹿 安帝延光三年扶風言
白鹿見雍潁川言白鹿及白虎二見陽翟 順帝陽嘉
元年十月中望都蒲陰狼殺童兒九十七人時李固對
策引京房易傳曰君將無道害將及人去之深山以全身
厥災狼食人陛下覺悟比求隱滯故狼災息 桓帝永
興元年張掖言白鹿見 延熹五年驚馬逸象突入宮
殿 永康元年西河言白兔見 靈帝建寧中羣狼數
十頭入晉陽南城門齧人 光和三年正月虎見樂平

觀又見憲陵上齧衛士蔡邕封事曰政有苛暴則虎狼食人

魏明帝青龍四年司馬懿獲白鹿獻之

吳孫權赤烏六年新都言白虎見 九年五月鄱陽言

虎仁

瑞應圖曰仁者王者不
暴虐則虎仁不害也

晉武帝太康六年南陽獻兩足猛獸此毛蟲之孽也識
者為其文曰武形有虧金獸失儀聖主應天斯異何為
言兆亂也京房易傳曰足少者下不勝任也干寶以為

獸者陰精居於陽金獸也南陽火名也金精入火而失其形王室亂之妖也六水數言水數既極火慝得作而金受其敗也至元康九年始殺太子距此十四年二十七十四火始終相乘之數也自帝受命至愍懷之廢凡三十五年焉七年十一月丙辰四角獸見於河間河間王顥獲之以獻天戒若曰角者兵象也四者四方之象當有兵亂起於四方後河間王遂連四方之兵作為亂階殆其應也懷帝永嘉五年蝮鼠出延陵郭景純筆

之曰此郡東之縣當有妖人欲稱制者亦尋自死矣其
後吳興徐馥作亂殺太守袁瑒馥亦時滅是其應也

成帝咸和六年正月丁巳會州郡秀孝於樂賢堂有麀

居筠反

見於前獲之孫盛以為吉祥夫秀孝天下之彥士

樂賢堂所以樂養賢也自喪亂以後風教陵夷秀孝策
試四科之實麀興於前或斯故乎 哀帝龍和元年十

月甲申有麀入東海第百姓謹言曰主入東海第識者
怪之及海西廢為東海王乃入其第 孝武太元十三

年四月癸巳祠廟畢有鬼行廟堂上天戒若曰兔野物而集宗廟之堂不祥莫之甚焉

石虎時郡國前後送蒼麟十六白鹿七虎命司虞張曷柱調之以駕芝蓋列於充庭之乘

苻堅末年猛獸及狼食人行路斷絕

苻生既立猛獸及狼大暴晝則斷道夜則發屋惟害人不食六畜一年殺七百餘人百姓苦之皆聚而邑居為害滋甚遂廢農業内外洵懼

慕容超祀南郊將登壇有獸大如馬狀類鼠而色赤
集於圜丘之側俄而不知所在須臾大風暴起天地
晝昏其行宮羽儀皆振裂

宋文帝元嘉二十八年秋猛獸入郭內為災

梁武帝天監六年三月有三象入建鄴 中大同元年
邵陵王綸在南徐州卧内方晝有狸鬪於欄上墮而獲
之至太清中侯景之亂將兵援臺城至鍾山有鰲熊無
何至齧綸所乘馬毛蟲之孽也綸尋為王僧辨所敗亡

南陽為西魏所殺 中大同中每夜狐鳴闕下數年乃
止京房易飛侯曰野獸羣鳴邑中且空虛俄而國亂丹
陽死喪略盡 元帝承聖元年十二月淮南有野象數
百壞人室廬宣城郡猛獸暴食人

陳後主禎明中狐入牀下捕之不獲京房易飛侯曰狐
入君室室不居未幾而國滅

魏明元帝神瑞二年射白熊於頽牛山獲之 太武太
延元年白兔見於渤海

東魏孝靜武定三年九月豹入鄴城南門格殺之 五年八月豹又上銅爵臺京房易飛候曰野獸入邑及至朝廷若道上官府門有大害君亡是歲東魏師敗於玉壁神武遇疾崩

北齊後主武平二年有兔出廟社之中京房易飛候曰兔入王室其君亡按廟者祖宗之神室也後五歲周師入鄴後主東奔 三年鄴都并州並有狐媚多截人髮武平中朔州府門外無何有小兒腳跡又擁土為城

雉之狀時人怪而察之乃孤媚所為漸流至并鄴與武
定三年同占是歲南安王思好起兵於北朔直指并州
為官軍所敗鄭子饒羊法噐等復亂山東 武平末并
鄴諸州多狼而食人洪範五行傳曰狼貪暴之獸大體
以白色為主兵之表也又似犬近犬獸也京房易傳曰
君將無道害將及人去之深山以全身厥妖狼食人時
帝任用小人競為貪暴殘賊人物食人之應尋為周軍
所滅兵之象也

隋煬帝大業四年張掖獲元狐

唐高宗永徽中河源軍有狼三晝入軍門射之斃永

淳中嵐勝州兎害稼千萬為羣食苗盡兎亦不復見

元宗開元三年有熊晝入揚州城肅宗乾元二年十

月詔百官上勤政樓觀安西兵赴陝州有狐出於樓上

獲之代宗大歷四年八月己卯虎入京師長壽坊宰

臣元載家廟射殺之虎西方之屬威猛吞噬刑戮之象

六年八月丁丑獲白兎於太極殿之內廊占曰國有

憂白喪祥也 德宗建中三年九月己亥夜白虎入宣陽里傷人三詔朝獲之 貞元二年乙丑有野鹿至含元殿前獲之壬申又有鹿至含元殿前獲之占曰有大喪 四年三月癸亥有鹿至京師西市門獲之 八年正月鄂州獻白鹿 憲宗元和十年五月臨碧院使奏壽昌殿南獲白鹿麕進之 穆宗長慶二年五月有自吐蕃至者稱隴上自去歲以來出異獸如猴而腰尾皆長色青迅猛見蕃人即捕而食之遇漢人則否

開成四年四月有麋出於太廟獲之 昭宗天祐元年

九月汴州進白兔

後漢隱帝乾祐二年五月潁州進白兔 三年正月有

狐出明德門獲之比常狐毛長腹刺二足五月太白進

白兔

後周世宗顯德三年潁州進白兔

南漢劉鋹時有野獸觸宮中寢門

宋太祖建隆三年五月有象至黃州黃陂縣匿林木中

食民苗稼又至安復襄唐州踐民田頗為患遣使捕之
明年十二月於鄧州南陽縣獲之獻其齒革 乾德二

年五月有象至澧州安鄉澧陽等縣又有象涉江入岳

州華容縣直過關闌十月又有象至澧州澧陽縣城北

五年有象自至京師

羣臣表賀以為巨獸由遠方而
來國家當撫有海南之兆也未

幾廣
南平

開寶八年四月陝州平陸縣驚獸傷人遣使捕

之生獻數頭十月江陵府白晝虎入市傷二人 太宗

太平興國三年果閬蓬集州虎為害遣殿直張延鈞捕

之獲百數俄而巴州七盤縣虎傷人延鈞又獲七以皮為獻 七年越州虎入蕭山縣民趙訓家害八口 雍

熙四年五月有犀自黔南入萬州民捕殺之獲其皮角淳化元年十月桂州虎傷人詔遣使捕之 至道元

年六月鳳州梁泉縣虎傷人 二年九月蘓州虎夜入

福山寨食守卒四人 真宗咸平二年十二月黃州長

折村二虎夜鬪一死食之殆半占云守臣災明年知州

王禹偁卒 六年十月乙丑有狐出皇城東北角樓歷

軍器庫至夾道獲之潭州獻白鹿潁州獻白麀單州獻
白麀開封府大唐縣獻黑兔沂州獻紫兔 大中祥符
元年五月封禪經度制置使王欽若言泰山舊多虎自
興功以來雖屢見而未嘗傷人悉相率入徂徠山而去
九年三月杭州浙江側有虎入稅場巡檢俞仁祐揮
戈殺之 神宗熙寧元年九月撫州獲白兔十二月嵐
州獲白鹿 四年九月廬州獲白兔 徽宗政和五年
十二月安化軍獲白兔 宣和元年二月淄川獲黑兔

七月秋有狐由艮嶽直入御中據御榻而坐詔毀狐
王廟蓋北狩之兆 高宗紹興十年春有野豕入海州
市民刺殺之時州陷敵夏鎮江軍帥王勝攻取之明年
和戎以其郡屬金悉空其民渡江後二十年有二虎入
城人射斃之虎亦搏人明年魏勝舉州來歸亦徙民如
昔虎豕皆毛孽也漢志龔遂曰野獸入宮室宮室將空
危亡象也 十一年隨州大洪山有跛虎久為人患近
毛孽也 十三年南康縣雷雨羣狸震死岩穴中岩石

為碎 紹興中句容縣有狸毛色如虎 孝宗乾道七
年潮州野象數百為羣秋成食稼農設穽田間象不得
食率其羣圍行道車馬保伍積穀委之乃解圍 淳熙
二年江州馬當山羣狐掠人 十年滁州有熊虎同入
樵民舍夜自相搏死 光宗紹熙元年三月臨安府民
家猫生子一首八足二尾 四年鄂州武昌縣虎為人
患虎西方之屬威猛吞噬刑戮之象 五年八月揚州
獻白兔侍御史章穎劾守臣錢之望以孽為瑞坐黜占

曰國有憂白喪祥也與唐大歷六年獲白兔同占是歲
光宗皇帝晏駕 寧宗慶元三年德興縣羣狐入民舍
皆毛孽也

麒麟

騶虞

春秋哀公十四年春西狩于大野叔孫氏之車子鉏商
獲麟

大野在高平鉅野
東北大澤是也

以為不祥以賜虞人仲尼觀之

曰麟也然後取之 公羊傳何以書記異也何異爾非

中國之獸麟者仁獸也有王者則至無王者則不至有

以告者曰有麇而角者孔子曰孰為來哉反袂拭面涕

沾袍曰吾道窮矣

麟太平之符聖人之類時得麟而死此亦天告夫子將沒之徵故云爾

穀梁傳西狩獲麟引取之也

言引取之者解經言獲也傳例曰諸獲者皆不

與也今言獲麟自為孔子來魯引而取之亦不與魯之辭也

狩地不地不狩也非狩

而曰狩大獲麟故大其適也

適猶如也之也非狩而言狩大得麟故以大所如者

名之也且實狩當言冬不當言春

其不言來不外麟於中國也不言有

不使麟不恒有於中國也

漢武帝元狩元年冬十月行幸雍祠五畤獲白麟作白

麟之歌

後漢明帝永平十一年麒麟出 安帝延光三年潁川

言麒麟見陽翟 四年東郡言麒麟見濮陽

吳孫權赤烏元年武昌言麒麟見

晉武帝泰始元年郡國言麒麟見 二年麒麟又見

咸寧五年二月甲午白麟見於平原九月甲午麒麟見

於河南 太康元年四月白麟見於頓邱 愍帝建興

二年麟見於襄平 成帝咸和八年麒麟駒虞見於遼

東

石虎時郡國送蒼麟十六

詳見毛蟲之異

梁武帝天監十年荊州言騶虞見

隋文帝開皇四年渝州獲獸似麋一角四蹄

唐高宗龍朔三年十月十六日絳州麟見二十六日含

元殿前麟趾見至來年改麟德 憲宗元和七年十一

月梓州上言龍州界嘉禾生有麟食之每來一鹿引之

羣鹿隨焉光華不可正視使畫工就圖之并嘉禾一函

以獻 文宗太和元年十一月河中奏當管虞鄉縣有
白虎入重峯觀按瑞應圖義獸也一名騶虞王者德至
鳥獸澤同幽冥則見

蜀王建元年騶虞見武定 三年十月麟見璧州

永平二年六月麟見文州 三年正月麟見永泰五
月騶虞見璧山有二鹿隨之 四年麟見昌州

宋太宗太平興國九年嵐州獻牡獸一角似鹿無斑文
角端有肉性馴詔羣臣參驗有散騎常侍徐鉉等援引

國史以為麟上言曰案春秋曰麇身而有角者麟也春秋感精符曰麟一角者明海內同一主也公羊傳曰上有聖帝明王天下太平則麟見今國海內一統故仁獸出實王者之大瑞宰相宋琪李昉等同其義皆奉表稱賀徽宗雍熙二年閏九月坊州獻一角獸如嵐州麟而牡瑞應圖云牡曰麒麟牝曰麟政和五年重和元年宣和二年三年寧宗慶元三年俱有牛生麒麟事

詳見

牛異

馬異

伏犧氏有天下龍馬負圖出於河遂法之以畫八卦

註龍

而形象
馬也

左氏傳定公十年宋公子地有白馬四公嬖向魋魋欲之公取而朱其尾鬣以予之地怒使其徒扶魋而奪之魋懼將走公閉門而泣之目盡腫公弟辰謂地曰子為君禮不過出境君必止子地出奔陳公不止辰為之請弗聽辰曰是我誑吾兄也我與國人出君誰與守遂與

其徒出奔陳明年俱入於蕭以叛大為宋患近馬禍

史記秦孝公二十一年有馬生人昭公二十年牡馬生

子而死劉向以為皆馬禍也孝公始用商君攻守之法

東侵諸侯至於昭王用兵彌烈

師古曰
烈猛也

其象將以兵革

抗極成功而還自害也牡馬非生類妄生而死猶秦恃

力彊得天下而還自滅之象也一曰諸畜生非其類子

孫必有非其姓者至於始皇果呂不韋子京房易傳曰

方伯分威厥妖牡馬生子亡天子諸侯相伐厥妖馬生

人

漢文帝十二年有馬生角於吳角在耳前上鄉右角長三寸左角長二寸皆大二寸劉向以為馬不當生角猶吳不當舉兵向上也時吳王濞封有四郡五十餘城內懷驕恣後卒舉兵誅滅京房易傳曰臣易上政不順厥妖馬生角茲謂賢士不足又曰天子親伐馬生角武

帝元鼎四年秋馬生渥洼水中

李斐曰南陽新野有暴利長當武帝時遭刑屯

田燉煌界數於此水旁見羣野馬中有奇者與凡馬異來飲此水利長先作土人持勒絆於水旁後馬玩習久

之代土人持勒鞞收得其馬獻之
故神異此馬故云從水中出也
作天馬之歌 太初

四年春貳師將軍李廣利斬大宛王首獲汗血馬來應

曰大宛舊有天馬種蹋石汗血汗從前肩膊出如血號
一日千里師古曰蹋石謂蹋石而有跡言其蹏堅利

作西極天馬之歌 成帝綏和二年二月大廐馬生角

在左耳前圍長各二寸時王莽為大司馬害上之萌自

此始矣 哀帝建平二年定襄牡馬生駒三足隨羣飲

食太守以聞馬國之武用三足不任用之象也後侍中

董賢年二十二為大司馬居上公位天下不宗哀帝暴

崩太后收賢印綬賢自殺王莽代之

後漢更始二年二月車駕發雒陽欲之長安司直李松
奉引車奔觸北宮鐵柱門三馬皆死馬禍也時更始失
道將亡 桓帝延熹五年四月驚車與逸象突入宮殿

近馬駝也時桓帝政衰缺 靈帝光和元年司徒長史

馮巡馬生人

風俗通曰巡馬生胡子問養馬胡蒼頭乃奸此馬以生子

京房易傳曰

上亡天子諸侯相伐厥妖馬生人後馮巡遷甘陵相黃
巾初起為所殘殺而國家亦四面受敵其後關東州郡

舉兵相攻天子西移王政隔塞其占與京房同 光和中雒陽水西橋民馬逸走遂齧殺人時公卿大夫及左右數有被誅者

晉武帝太康元年遼東有馬生角在兩耳下長三寸按劉向說曰此兵象也及帝晏駕之後王室毒於兵禍是其應也京房易傳曰臣易上政不順厥妖馬生角茲謂賢士不足又曰天子親伐馬生角呂氏春秋曰人君失道馬有生角及惠帝踐阼昏愚失道又親征伐成都是

其應也 惠帝元康八年十二月皇太子將釋奠太傅
趙王倫驂乘至南城門馬止力推之不能動倫入輅車
乃進此馬禍也天戒若曰倫不知義方終為亂逆非傳
導行禮之人也 九年十一月戊寅忽有牡騮馬驚奔
至廷尉訊堂悲鳴而死天戒若曰愍懷冤死之象也見
廷尉訊堂其天意乎 懷帝永嘉六年二月神馬鳴南
城門 愍帝建興二年九月蒲子縣馬生人京房易傳
曰上亡天子諸侯相伐厥妖馬生人是時帝室衰微不

絕如線胡狄交侵兵戈日逼尋而帝亦淪陷故此妖見也元帝太興二年丹陽郡吏濮陽演馬生駒兩頭自項前別生而死司馬彪說曰此政在私門二頭之象也其後王敦陵上成帝咸康八年五月甲戌有馬色赤如血自宣陽門直走入於殿前盤旋走出尋逐莫知所在已卯帝不豫六月崩此馬旣又赤祥也是年張重華在涼州將誅其西河相張祚旣馬數十匹同時悉無後尾也安帝隆安四年十月梁州有馬生角刺史郭銓

送示桓元按劉向說曰馬不當生角猶元不當舉兵向
上也元不悟以至夷滅

石季龍在鄴有一馬尾有燒狀入其中陽門出顯陽
門東宮皆不得入走向東北俄爾不見術者佛圖澄
歎曰災其及矣逾年季龍死其國遂滅

慕容廆有駿馬曰赭白有奇相逸力石虎之伐棘城
也孰將出避難欲乘之馬悲鳴踞齧人莫能近孰曰
此馬見異先朝孤常仗之濟難今不欲者蓋先君之

意乎乃止虎尋退虢益奇之至是四十九歲而駿逸不虧雋比之鮑氏驄命鑄銅以圖其象親為銘贊鐫其旁置之薊城東掖門是歲象成而馬死

梁末侯景僭號江南每將戰所乘白馬長鳴蹠足者輒勝垂頭者輒不利西州之役馬卧不起景拜請筆之竟不動近馬禍也景因此敗

陳宣帝大建五年衡州馬生角五行傳以為兵象敗亡之表吳明徹師敗為周師所虜

北齊文宣天保中廣宗有馬兩耳間生角如羊尾京房
易傳曰天子親伐則馬生角四年契丹犯塞文宣親御
六軍擊之

隋煬帝大業四年太原廐馬死者大半帝怒遣使按問
主者曰每夜廐中馬無故自驚因而致死帝令巫者視
之巫者知帝將有遼東之役因希旨言曰先帝令楊素
史萬歲取之將鬼兵以伐遼東也帝大悅因釋主者洪
範五行傳曰逆天氣故馬多死是時帝每歲巡幸北事

長城西通且末國內虛耗天戒若曰除廐馬無事巡幸
帝不悟遂至亂 十一年河南扶風二郡並有馬生角
長數寸與天保初同占是時帝頻歲親征高麗 恭帝
義寧元年帝在江都宮龍廐馬無故而死旬日死至數
百匹與大業四年同占 二年五月戊申有馬生角長
二寸末有肉角兵象

唐高祖武德二年十月王世充偽左僕射韋霽馬生角
當項 高宗永隆二年監牧馬大死十八萬匹馬者國

之武備天去其備國將危亡 武后文明初新豐有馬
生駒二首同項各有口鼻生而死又咸陽牝馬生石大
如升上微有綠毛皆馬禍也 元宗開元十二年五月
太原獻異馬駒兩肋各十六肉尾無毛 二十五年濮
州有馬生駒肉角 二十九年三月滑州刺史李邕獻
馬肉鬣鱗臆嘶不類馬日行三百里 德宗建中四年
五月滑州馬生角 文宗太和九年八月易定馬飲水
因吐一珠以獻 開成元年六月揚州民明齊家馬生

角長一寸三分 武宗會昌元年四月桂州有馬生駒
三足能隨羣於牧 懿宗咸通三年郴州馬生角 十
一年沁州綿上及和川牡馬生子皆死京房易傳曰方
伯分威厥妖牡馬生子 僖宗乾符二年河北馬生人
中和元年九月長安馬生人 二年二月蘇州嘉興
馬生角 光啓二年夏四月僖宗在鳳翔馬尾皆咤蓬
如篲咤怒象 文德元年李克用獻馬二肘膝皆有鬣
長五寸許蹄大如七寸甌

宋太宗太平興國三年靈州獻官馬駒足各有二距
雍熙二年虔州吏李祚家馬生駒足各有二距 四年
鄜州直羅縣民高英家生馬前兩足如牛 端拱二年
夏州民程真家馬生二駒 真宗大中祥符九年十二
月大名監馬生駒赤色肉尾無鬃 徽宗宣和五年馬
生兩角長三寸四足皆出距時北方正用兵 高宗紹
興八年廣州西海壩有海獸如馬蹄鬣皆丹夜入民舍
聚衆殺之明日海溢環村百餘家皆溺死近馬禍也

五年廣西市馬全綱疫死 孝宗淳熙六年十二月宕
昌西馬金州馬皆大疫 十二年黎雅州獻馬有角長
二寸京房易傳曰臣易上政不順厥妖馬生角茲謂賢士
不足 光宗紹熙元年二月丙申右丞相乘馬早朝入
禁扉馬斃近馬禍也 寧宗嘉定五年正月右丞相入
賀於東宮馬驚墮地衣幘皆敗相額微損事與上同

牛禍

春秋宣公三年郊牛之口傷改卜牛牛死劉向以為近

牛禍也時宣公與公子遂謀殺子赤而自立又以喪娶

區霽昏亂亂成於口天猶惡之生則不饗其祀

謂郊牛傷死

死則災燔其廟

成三年新宮災新宮宣之廟也以新成故云

董仲舒指略同

秦孝文王五年旂胸衍

胸衍地名

有獻五足牛劉向以為近

牛禍也先是文惠王初都咸陽廣大宮室南臨渭北臨

涇思心失逆土氣足者止也戒秦建止奢秦將致危亡

秦不改至於離宮三百復起阿房京房易傳曰興繇役

奪民時厥妖牛生五足

漢景帝中六年梁孝王田北山有獻牛足生背上劉向
以為近牛禍先是孝王驕奢起苑方三百里宮館閣道
相連三十餘里納邪臣羊勝之計欲求為漢嗣刺殺議
臣爰盎事發免誅猶有恨心內則思慮霧亂外則土功
過制故牛禍作足出於背下姦上之象也猶不能解發
疾暴死又凶短之咎也

後漢明帝永平十八年牛疫死 章帝建初四年冬京
都牛大疫時竇皇后以宋貴人子為太子寵幸令人伺

求貴人過隙以讒毀之帝不知太后不善厥咎霜也

晉武帝太康元年幽州塞北有死牛頭語近牛禍也是時帝多疾病深以後事為念而托付不以至公思替亂之應也按師曠曰怨讎動於人則有非言之物而言又其義也京房易傳曰殺無罪牛生妖 惠帝泰安中江夏張騁所乘牛言曰天下亂乘我何之騁懼而還犬又言曰歸何早也尋後牛又人立而行騁使善卜者卦之謂曰天下將有兵亂為禍非止一家其年張昌反先略

江夏騁為將帥於是五州殘亂騁亦族滅京房易傳曰牛能言如其言占為凶易萌氣樞曰人君不好士走馬被文繡犬狼食人食則有六畜言時天子諸侯不以惠下為務又其應也 元帝建武元年七月晉陵陳門才牛生犢一體兩頭京房易傳曰牛生子二首一身天下將分之象也是時愍帝蒙塵於平陽尋為劉聰所殺元帝即位江東天下分為二是其應也 太興元年武昌太守王諒牛生子兩頭八足兩尾共一腹三年後死又

有牛一足三尾皆生而死按司馬彪說兩頭者政在私門上下無別之象也京房易傳曰足多者所任邪也足少者不勝任也其後王敦等亂政此其祥也 四年十二月郊牛死按劉向說春秋郊牛死曰宣公區霑昏亂故天不饗其祀今元帝中興之業實王導之謀也劉隗探會上意以得親幸導見疏此區霑不睿之禍 成帝咸和二年五月護軍牛生犢兩頭六足是冬蘇峻作亂七年九德人袁榮家產犢兩頭八足二尾共身桓元

之國在荊州諸刺史殷仲堪行至鶴穴逢一老公驅青牛形色瓌異桓元即以所乘牛易取乘至零陵涇溪駸駸所吏反非常息駕飲牛牛逕入江水不出元遣人覘守經日無所見於後元敗被誅

梁武陵王紀祭城隍神將烹牛忽有赤蛇繞牛口牛禍也象類言之又為龍蛇之孽魯宣公三年牛之口傷時以為天不享棄宣公也五行傳曰逆君道傷故有龍蛇之孽時紀雖以赴援為名而實妄自尊亢思心之咎神

不享君道傷之應果為元帝所敗

陳宣帝太建三年監豫州陳桃根獻青牛

後魏孝文承明元年牛疫死傷大半

北齊後主武平二年并州獻五足牛牛禍也洪範五行傳曰牛土應宮室之象也帝尋大發卒於仙都苑鑿池築山樓殿間起窮華極麗功始就而國亡

後周武帝建德六年陽武有獸三狀如水牛一黃一赤一黑赤與黑者鬬久之黃者自傍觸之黑者死黃赤俱

入河近牛禍也黑周所尚色死者滅亡之象後數載隋代周旗牲尚赤戎服以黃

隋文帝大業初恒山有牛四脚膝上各生一蹄其後建東都築長城開溝洫

唐高宗調露元年春牛大疫京房易傳曰牛少者穀不成又占曰金革動武后長安中有獻牛無前膊三足而行者又有牛膊上生數足蹄甲皆具武太后從姊之子司農卿宗晉卿家牛生三角中宗神龍元年春

牛疫 二年冬牛疫 先天初洛陽市有牛左脇有人
手長一尺或牽之以乞丐 元宗開元十五年河北牛
大疫 代宗大歷八年武功櫟陽民家牛生犢二首
德宗貞元二年牛疫 四年郊牛生犢六足足多者下
不一 七年闕輔牛大疫 懿宗咸通七年荊州民家
牛生犢五足 十五年夏渝州江陽有水牛生驢駒死
僖宗光啓元年河東有牛人言其家殺而食之 二
年延州膚施有死牛復生

宋太祖乾德三年至真宗天禧五年州縣上言民間牛
生二犢三犢者凡一百二十二 太宗太平興國九年
七月知乾州衛昇獻三角牛 仁宗天聖迄英宗治平
牛生二犢者三十二三犢者一 神宗熙寧三年距元
豐八年郡國言民家牛生二犢者三十五生三角者一
哲宗元祐元年距元符三年郡國言民家牛生二犢
者十有五 徽宗大觀元年閬州達州俱言牛生二犢
政和五年七月安武軍言信都縣民范濟家牛生麒

麟 重和元年三月陝州言牛生麒麟 宣和二年十

月尚書省言歙州歙縣民鮑珙家牛生麒麟 三年五

月汝州梁縣民邢喜家牛生麒麟 高宗紹興元年紹

興府有牛戴刃突入城市觸馬裂腹出腸時衛卒多犯

禁屠牛者牛受刃而逸近牛禍也 十六年靜江府城

北二十里有奔犢觸人於壁腸胃流地牛狂走兩日不

可執卒以射死牛禍也 十八年五月邛州依政縣牛

生二犢 二十一年七月遂寧府牛生二犢三 二十

五年八月漢州牛生二犢 孝宗淳熙十二年臨安府
仁和縣良渚有牛二首四足七日而死餘杭縣有犢二
首一身 光宗紹熙十四年春淮西牛大疫死 寧宗
慶元元年淮浙牛多疫死 三年饒州樂平縣田家牛
生犢如馬一角麟身四尾農民以不祥殺之或惜其為
麟同縣萬山牛生犢人首

文獻通考卷三百十一

欽定四庫全書

文獻通考卷三百十二

鄱陽馬端臨貴與著

物異考十八

豕禍

左傳齊襄公田于貝邱見豕從者曰公子彭生也公怒射之豕人立而啼公懼墮車傷足喪屨劉向以為近豕禍也未幾公為公孫無知所弑

漢昭帝元鳳元年燕王宮永巷中豕出園壞都竈

師古曰園

者養豕之牢也都竈炆之大竈圉胡頓反

銜其脯六七枚置殿前

脯古劉釜反

向以為近豕禍也時燕王旦與長公主左將軍謀為大逆暴急無道竈者生養之本豕而敗竈陳脯於庭脯竈將不用宮室將廢辱也燕王不改卒伏其辜京房易傳曰衆心不安君政厥妖豕入居室

吳孫皓時野豕入右司馬丁奉營此豕禍也後奉見遣攻穀陽無功而反皓怒斬其導軍及舉大衆北出奉及

萬或等相謂曰若至華里不得不各還也此謀泄奉時已死皓殺其子溫家屬皆遠徙豕禍之應也龔遂曰山野之獸來入宮室宮室將空又其應也

晉懷帝永嘉中壽春城中有豕生兩頭而不活周馥取而觀之時識者云豕北方之畜生而兩頭者無上也生而死不遂也天戒若曰勿生專利之謀將自致傾敗也周馥不悟遂欲迎天子令諸侯俄為元帝所敗是其應石勒亦尋渡淮百姓死者十有其九元帝建武元年

有豕八足此聽不聽之罰又所任邪也是後有劉隗之

變 成帝咸和六年六月錢塘人家豕音加壯豕也產兩

子而皆人面睂目皆具其身猶豕京房易傳曰豕生人

頭豕身者危且亂今此豕豕而產異之甚也 孝武帝

太元四年四月京都有豚徒渾反一頭二脊八足 十三

年京都人家豕產子一頭二身八足並與建武同妖也

是後宰相沉酗香弓反不恤朝政近習用事漸亂國綱至

於大壞也

劉聰末年犬與豕交於相國府門又交於宮門又交於
司隸御史門有豕著進賢冠升聰座犬冠武冠帶綬
與豕並升俄而鬪死殿上宿衛莫有見其入者 劉
曜時武功豕生犬

隋文帝開皇末渭南有沙門三人行頭陀法於人塲圃
之上夜見大豕來詣其所小豕從者十餘謂沙門曰阿
練我欲得賢聖道然猶負他一命言罷而去賢聖道者
君上之所行也皇太子勇當嗣業行君上之道而被囚

廢之象也一命者言為煬帝所殺 渭南有人寄宿他舍夜中聞二豕對語其一曰歲將盡阿耶明日殺我供歲何處避之一答曰可向水北姊家因相隨而去天將曉主人見豕不得意是宿客而詰之宿客言狀主人如其言而得豕其後蜀王秀得罪帝將殺之平樂公主每匡救得全後數年而帝崩歲盡之應

唐太宗貞觀十七年六月司農寺豕生子一首八足自頸分為二 德宗貞元四年二月京師民家有豕生子

兩首四足首多者上不一也是歲宣州大雨震電有物墮地如豬手足各兩指執赤班蛇食之頃之雲合不復見近豕禍也 憲宗元和八年四月長安西市有豕生子三耳八足自尾分為二足多者下不一也 懿宗咸通七年徐州蕭縣民家豕出園舞又牡豕多將隣里羣豕而行復自相噬齧 僖宗乾符六年越州山陰民家有豕入室內壞器用銜案正置水次 廣明元年絳州稷山縣民家豕生如人狀無眉目耳髮占為邑有亂

宋太祖乾道六年南雄州民家豕生數豚而首各備他獸形亦有人首者占為邑有亂 光宗紹熙二年三月辰州叙浦縣常平倉廩墻壁為羣豕所穴食倉米五十石彘食人食近豕禍也 寧宗慶元初饒州樂平縣民家豕生豚與南雄豕禍同占而更具他獸蹄京房妖占曰豕生人頭豕身者危且亂 三年四月饒州餘干州民家生八豚其二為鹿福州古田縣民生嬰兒為豕所食皆豕禍也

羊禍

史記魯定公時季桓子穿井得土缶中得蟲若羊

缶蓋之屬

即今之盆

近羊禍也羊者地上之物幽於土中象定公不用

孔子之言而聽季氏暗昧不明之應一曰羊去野外而拘土缶者象魯公失其所而拘於季氏季氏亦將拘於家臣也是歲陽虎囚季桓子後三年虎劫公伐孟氏兵敗竊寶玉大弓出亡

晉成帝咸和二年五月司徒王導廐羊生無後足此羊

禍也京房易傳曰足少者下不勝任也明年蘇峻破京都導與帝俱幽石頭是其應也

隋文帝開皇十二年六月繁昌楊悅見雲中二物如羝羊黃色大如新生犬鬬而墜悅獲其一數旬失所在近羊禍也洪範五行傳曰君不明逆火政之所致也狀如新生犬者羔類也雲體掩蔽邪佞之象羊國姓羔羊子也皇太子勇既升儲貳晉王陰毀之而被廢黜二羔鬬一羔墜之應也恭帝義寧二年麟遊太守司馬武獻

羊羔生而無尾時議者以為楊氏子孫無後之象是歲煬帝被弑恭帝遜位又太原獻殺羊無頭而不死

唐元宗開元二年正月原州獻肉角羊 二年三月富平縣有肉角羊 武宗會昌二年春代州崞縣羊生二首連頸兩尾占曰二首上不一也 懿宗咸通三年夏定陶民家羊生羔如犢 僖宗乾符二年洛陽建春門外因暴雨有物墮地如殺羊不食頃之入地中其跡月餘不滅或以為雨工也占曰當旱

漢劉鋹苑中羊吐珠

宋高宗紹興五年江東西羊大疫班固以為暑歲羊多疫死及為怪 十七年汀州羊生無角 寧宗嘉定九年信州玉山縣羊生駢角

犬異

春秋左氏傳襄公十七年十一月甲午宋國人逐猘狗

猘狂也
征例反

猘狗入于華臣氏

華元子

國人從之臣懼遂奔陳

先是臣兄閔為宋卿閔卒臣使賊殺閔家宰遂就其妻

宋平公聞之曰臣不唯其宗室是暴大亂宗國之政遂

逐之左師向戌曰大臣不順國之恥也不如蓋之

謂掩覆其

事也公乃止華臣亢暴失義內不自安故犬禍至以犇亡

也

威烈王二十七年乙亥五月晉有三大犬率衆犬數萬

聚于絳殺一犬于東方一犬于西方

漢高后八年三月被霸上

師古曰被者除惡之祭也音廢

還過枳道見

物如倉狗戢高后掖

師古曰戢調拘持之也戢音戟拘音居足反

忽而不見

卜之趙王如意為祟遂病掖傷而崩先是高后鵠殺如

意支斷其母戚夫人手足摧其眼以為人彘

師古曰摧謂敲擊去

其精也推音口角反凡言彘者皆豕之別名

文帝後五年六月齊雍城門

外有狗生角

師古曰雍城門者齊門名也春秋左氏傳平陽之役趙武及秦周伐雍門之莢是也

先是帝兄齊悼惠王亡後帝分齊地立其庶子七人皆

為王

師古曰謂齊孝王將閭濟北王志菑川王賢膠東王雄渠膠西王卬濟南王辟光并城陽恭王喜是

為七王

兄弟並彊有炕陽心故犬禍見也犬守御角兵象

在前而上鄉者也

師古曰鄉讀曰嚮此下亦同

犬不當生角猶諸侯

不當舉兵鄉京師也天之戒人蚤矣

師古曰蚤古早字

諸侯不

悟後六年吳楚叛濟南膠西膠東三國應之舉兵至齊

齊王猶與城守

與讀曰豫

三國圍之會漢破吳楚因誅四王

故天狗下梁而吳楚攻梁狗生角於齊而三國圍齊漢卒破吳楚於梁誅四王於齊京房易傳曰執政失下將害之厥妖狗生角君子苟免小人陷之厥妖狗生角

景帝三年二月邯鄲狗與彘交悖亂之氣犬豕之禍也

師古曰悖惑也音布內反此下亦同

是時趙王遂悖亂與吳楚謀為逆遣

使匈奴求助兵卒伏其辜犬兵革失衆之占

如淳曰犬吠守似兵

革外附他類失衆也

豕北方之畜七國逆言失聽交於異域以生

害也京房易傳曰夫婦不嚴厥妖狗與豕交茲謂反德

國有兵革 昌邑王有狗冠方山冠事

詳見服妖門

成帝

河平元年長安男子石良劉音相與同居

師古曰二人共止一室

有如人狀在於室中擊之為狗走出去後有數人被甲

持兵弩至良家良等格擊或死或傷皆狗也自二月至

六月乃止 鴻嘉中狗與彘交

魏公孫淵家有犬冠幘絳衣上屋此犬禍也屋上亢陽
高危之地天戒若曰亢陽無上偷自尊高狗而冠者也
及淵自立為燕王果為魏所滅京房易傳曰君不正臣
欲篡厥妖狗出朝門 魏侍中應璩在直廬歎見一白
狗出門問衆人無見者踰年卒近犬禍也

吳諸葛恪征淮南歸將朝會犬銜引其衣恪曰犬不欲
我行乎還坐有頃復起犬又銜衣乃令逐犬遂升車入
而被害

晉武帝太康九年幽州有犬鼻行地三百餘步天戒若
曰是時帝不思和嶠之言卒立惠帝以致衰亂是言不
從之罰也 惠帝元康中吳郡婁縣人家聞地中有犬
子聲掘之得雌雄各一還置窟中覆以磨石經宿失所
在天戒若曰帝既衰弱藩王相譖故有犬禍 永興元
年丹陽內史朱達家犬生三子皆無頭後達為揚州刺
史曹武所殺 孝懷帝永嘉五年吳郡嘉興張林家狗
人言云天下人餓死有劉石之亂天下饑荒焉 愍帝

建興狗與豬交按漢書景帝時有此以為悖亂之氣亦
犬豕禍也犬兵革之占也豕北方之畜其占逆言失聽
異類相交必生害也俄而帝沒於漢是其應也 元帝

太興中吳郡太守張懋聞齋內牀下犬聲求而不得既
而地自坼見有二犬子取而養之皆死尋而懋為沈充
所害京房易傳曰讒臣在側則犬生妖 太興四年廬

江瀟縣何旭家忽聞地中有犬子聲掘之得一母犬青

釐音黎黑而黃色狀甚羸瘦走入草中不知所在視其處有

二犬子一雄一雌哺而養之雌死雄活及長為犬善噬野獸其後旭里中為蠻所沒安帝隆安初吳郡治下

狗恒夜吠聚高橋上人家狗有限而吠聲甚眾或有夜

覘

勅艷反

視之云一狗假有兩三頭皆前向亂吠無幾孫

恩亂於吳會焉是時輔國將軍孫無終家於既陽地中聞犬子聲尋而地坼有二犬子皆白色一雄一雌取而養之皆死後無終為桓元所誅滅按尸子曰地中有犬名曰地狼夏鼎志曰掘地得犬名曰賈此蓋自然之物

不應出而出為犬禍也

桓元將拜楚王已設拜席羣官陪位元未及出有狗來便其席莫不驚怪元性猜暴竟無言者逐狗改席而已天戒若曰桓元無德而叨竊大位故犬便其席示其妄據之甚也八十日元敗亡焉

劉聰末年犬與豕交

詳見豕禍門

北齊文宣天保四年鄴中及頓邱並有犬與女交洪範五行傳曰異類不當交而交諄亂之氣犬交人為犬禍

犬禍者亢陽失衆之應也時帝不恤國政恩澤不流於其國後主時犬為開封儀同雌者有夫人郡君之號給兵以奉養食以梁肉籍以茵蓐天奪其心爵加於犬近犬禍也天意若曰卿士皆類犬後主不悟遂以取滅後周武帝保定三年有犬生子腰已後分為兩身二尾六足犬猛畜而有爪牙將士之象也時宇文護與侯伏侯龍恩等有謀懷貳犬體後分此其應也

隋煬帝大業元年鴈門百姓聞犬多去其主羣聚於野

形頓變如狼而噉噬行人數年而止五行傳曰犬守禦者也而今去其主臣下不附之象形變如狼狼色白為主兵之應也其後帝窮兵黷武勞役不息天戒若曰無為勞役守禦之臣將叛而為害帝不悟遂起長城之役續有西域遼東之舉天下怨叛及江都之變並宿衛之臣也

唐高祖武德三年突厥處羅可汗將入寇夜聞犬羣吠而不見犬武后初酷吏邱神勣家狗生子無首當項

有孔如口晝夜鳴吠俄失所在 神功元年安國獻兩
首犬首多者上不一也 元宗天寶十一載李林甫晨
起盥飾將朝取書囊視之中有物如鼠躍於地即變為
狗壯大雄目張牙視林甫林甫射之中雪然有聲隨箭沒
武宗貞元七年趙州栢鄉民李崇真家黃犬乳犢

憲宗會昌三年定州深澤令家狗生角 宣宗大中初
狗生角京房曰執政失將害之應又曰君子危陷則狗
生角 懿宗咸通中會稽有狗生而不能吠擊之無聲

狗職吠以守禦其不能者象鎮守者不能禦寇之兆

成汭為荆南節度使城中犬皆夜吠日者向隱以為城
郭將邱墟 僖宗中和二年秋丹徒狗與鼯交占曰諸
侯有謀害國者

宋高宗紹興六年四月中京大雪雷震羣犬數十爭赴
土河而死可救者纔二三衆共異之未幾金人有內亂
之事 寧宗慶元二年撫州有犬人坐於郡守治事之
上後守臣林廷彥卒於官

下體生上之病

西漢景帝時梁孝王北獵梁山有獻牛足出背上王惡

之六月中病熱六日薨

張晏曰足當處下所以輔身也象孝王背朝而干上也北者陰

也又在梁山明為梁也牛者丑之畜衝在六月北方數六故六月六日王薨也

北周武帝保定三年有牛足生於背

唐懿宗咸通十四年七月宋州襄邑有獵者得雉五足三足出背上足出於背下干上之象五足者衆也

羽蟲之異

契母曰簡狄有娥氏之女為帝嚳次妃三人行浴見元鳥墜其卵簡狄取吞之因孕生契

姜嫄為帝嚳元妃履巨人跡而生稷以為不祥棄之置渠中冰上飛鳥以其翼覆薦之姜嫄以為神乃收養之高宗祭成湯有蜚雉登鼎耳而雊劉歆以為羽蟲之孽鼎宗廟之器野鳥自外來入為宗廟器主是繼嗣將易也一曰鼎三公象以耳行野鳥居鼎耳小人將居公位敗宗廟之祀武丁恐駭謀於忠賢修德而正事故能攘

其妖致百年之壽

周武王伐紂師渡孟津既濟有火自上復於下至於王

屋流為烏其色赤其聲魄云

馬融曰王屋王所居屋流行也魄然安定意也鄭元

曰書說云烏有孝名武王卒父大業故烏瑞臻赤者周之正色也索隱曰按今文泰誓流為鳴鵲孽鳥也馬融云明武王能伐紂

春秋昭公二十五年夏有鸛鵒來巢劉歆以為羽蟲之

孽其色黑又黑祥也視不明聽不聰之罰也劉向以為

蜚有蜚不言來者氣所生所謂青也

師古曰此蜚謂負蜚也其為蟲臭蜚

短狐即今所謂水弩也隱元年有蜚蜚音域蜚亦作蜚其音同耳鸛鵒言來

者氣所致所謂祥也鸛鵒邊土穴藏之禽來至中國不

穴而巢陰居陽位

師古曰今之鸛鵒中國皆有依周官而言但不踰濟水耳左氏以為魯所

常無異而書之而此云邊土禽來未喻其意又此鳥本亦巢居不皆穴處也書巢者著其居止字乳不即去也

象季氏將逐昭公去宮室而居外野也鸛鵒白羽旱之

祥穴居而好水黑色為主急之應也天戒若曰既失衆

不可急暴急暴陰將持節陽以逐爾去宮室而居外野

矣昭不悟而舉兵圍季氏為季氏所敗出犇於齊遂死

於外野董仲舒指畧同

赧王二十九年宋有雀生斨于城之陬史占之曰占小而生大必霸天下宋康王喜起兵滅滕伐薛東敗齊南敗楚西敗魏與齊魏為敵欲霸之亟成射天笞地斬社稷而焚滅之又為長夜之飲天下之人謂之桀宋齊湣王起兵伐之民散城不守宋王奔魏死于溫

漢景帝三年十一月有白頸烏與黑烏羣鬪楚國呂縣白頸不勝墮泗水中死者數千劉向以為近白黑祥時

楚王戊暴逆無道與吳王謀反烏羣鬪者師戰之象白
頸者小明小者敗也墮於水將死水地其後王戊反兵
敗走為人所殺京房易傳曰逆親親厥妖白黑烏鬪於
國 武帝太始三年二月行幸東海獲赤鴈作朱鴈之
歌 昭帝始元元年春二月黃鵠下建章宮太液池中

臣瓚曰時漢用土德服色尚黃鵠色皆白而今更黃以
為土德之瑞故紀之也師古曰非也黃鵠大鳥一舉千
里者非
白鵠也 元鳳元年有烏與鵠鬪燕王宮池上烏墮池

死近黑祥也時燕王旦謀為亂遂不改悟伏辜而死楚

燕皆骨肉藩臣以驕怨而謀逆俱有烏鵲闕死之祥行
同而占合此天人之明表也燕一烏鵲闕於宮中而黑
者死楚以萬數闕於野外而白者死象燕陰謀未發獨
王自殺於宮故一烏水色者死楚亢陽舉兵軍師大敗
於野故衆烏金色者死天道精微之效也京房易傳曰
專征劫殺厥妖烏鵲闕 昭帝時有鵜鰾或曰禿鷲師古

曰鵜鰾即汗澤也一名淘河腹下胡大如數升囊好羣入澤中抃水食魚因名禿鷲亦水鳥也鵜音大奚反鰾

音胡鷲音秋

集昌邑王殿下王使人射殺之劉向以為水鳥

青色青祥也時王馳騁無度慢侮大臣不敬至尊有服

妖之象

師古曰謂多治反注冠又以冠奴也

故青祥見也野鳥入處宮室

將空王不悟卒以亡京房易傳曰辟退有德厥咎狂厥妖水鳥集於中國宣帝元康三年春以神雀數集泰

山賜諸侯王丞相以下令郎從官帛吏民爵女子牛酒

鰥寡孤獨高年帛六月詔曰前年夏神爵集雍

晉灼曰漢注大

如鸚爵黃喉白頸黑背腹斑文也

今五色鳥以萬數飛過屬縣

三輔諸縣也

翱翔而飛欲集未下其令三輔毋得以春夏撻巢探卵

彈射飛鳥具為令 四年三月神爵五采以萬數集長

樂未央北宮高寢甘泉泰畤殿中及上林苑 京兆尹

張敞舍鵲雀飛集丞相府丞相黃霸以為神雀議欲以

聞敞奏霸曰長吏守丞對時臣敞舍有鵲雀飛止丞相

府屋上丞相以下見者數百人邊臣多知鵲雀者問之

皆陽不知丞相圖議上奏

圖謀也

曰臣聞上計長吏守丞

以興化條皇天報下神雀後知從臣敞舍來乃止郡國

吏竊笑丞相仁厚有知畧微信奇怪也

東坡致堂論見鳳凰門

成帝河平元年二月庚子泰山山桑谷有戴音鵲也焚其

巢男子孫通等聞山中羣鳥戴鵲聲往視見其巢音鵲也然古

字

盡墮地中有三戴鵲燒死

鳥子新生而哺者曰鵲

樹大四圍巢

去地五丈五尺太守以聞戴色黑近黑祥貪虐之類也

易曰鳥焚其巢旅人先笑後號咷泰山岱宗五嶽之長

王者易姓告代之處也天戒若曰勿近貪虐之人聽其

賊謀將生焚巢自害其子絕世易姓之禍其後趙飛燕

得幸立為皇后姊妹專寵後宮有子者殺之并殺其母

帝崩后坐誅此焚巢殺子後號咷之應也一曰王莽貪虐而任社稷之重卒成易姓之禍云京房易傳曰人主暴虐鳥焚其舍 鴻嘉二年三月博士行大射禮有飛

雉集於庭歷階登堂而雉後雉又集太常宗正丞相御史大夫大司馬車騎將軍之府又集未央承明殿屋上時大司馬車騎將軍王音待詔寵等上言天地之氣以

類相應

師古曰以經術待詔其人名寵不記姓流俗書本寵上輒加孫字非也

謹告人君

甚微而著雉者聽察先聞雷聲故月令以紀氣

師古曰謂季冬

之月云雉
雉雞乳也

經載高宗雉之異

師古曰已
解於上

以明轉禍為

福之驗今雉以博士行禮之日大衆聚會飛集於庭歷

階登堂萬衆睢睢

師古曰睢睢仰目
視貌也音呼推反

驚怪連日徑歷三

公之府太常宗正典宗廟骨肉之官然後入宮其宿留

告曉人具備深切

師古曰宿音先就
反留音力救反

雖人道相戒何以

過是宜謀於賢知克已復禮以求天意繼嗣可立災變可

銷也 綏和二年三月天水平襄有燕生爵哺食至大俱

飛京房易傳曰賊臣在國厥咎燕生爵諸侯銷一曰生

非其類子不嗣世

後漢明帝永平十一年獲白雉 十七年神雀五色翔

集京師 章帝元和二年幸泰山柴告岱宗有黃鵠三

十西南來經祠壇上東北過宮屋翺翔升降 桓帝永

壽元年白鳥見齊國 靈帝中平三年八月懷陵上有

萬餘爵先極悲鳴已亂鬪相殺皆斷頭懸著樹枝枳棘

到六年靈帝崩大將軍何進以內寵外嬖積惡日久欲

悉糾黜以隆更始冗政而太后持疑事久不決進從中

出於省內見殺因是有司盪滌虔劉後祿而尊厚者無餘矣夫陵者高大之象也天戒若曰諸懷爵祿而尊厚

者還自相害至滅亡也

古今註曰建武九年六郡八縣鼠食稼張璠紀曰初平元年三

月獻帝初入未央宮翟雉飛入未央宮獲之獻帝春秋曰建安七年五色大鳥集魏郡衆鳥數千隨之魏志曰二十三年禿鶩集鄴宮文昌殿後池

獻帝建安二十三年禿鶩鳥集鄴

宮文昌殿後池明年魏武王薨

蜀後主建興九年十月江陽至江州有鳥從江南飛渡江北不能達墮水死者以千數時諸葛亮連年動衆志

吞中夏而終死渭南所圖不遂又諸將分爭頗喪徒旅
鳥北飛不能達墮水死者皆有其象也亮竟不能過渭
是其應也

魏文帝黃初元年四月饒安縣言白雉見未央宮中又
有燕生鷹口爪俱赤此與商紂宋隱同象 三年又集

雉陽芳林園池

四年五月有鵜鷗

題胡
二音

鳥集靈芝池

按劉向說此羽蟲之孽又青祥也詔曰此詩人所謂汗
澤者也曹詩刺共音恭公遠君子近小人今豈有賢智之

士處於下位否則斯鳥胡為而至哉其博舉天下雋德
茂才獨行君子以答曹人之刺於是楊彪管寧之徒咸
見薦舉此所謂覩妖知懼者也雖然猶不能優容亮直
而多溺偏私矣京房易傳曰辟退有德厥妖水鳥集於
國井 七年燕又集雒陽芳林園池與三年同其夏文
帝崩 明帝景初元年陵霄闕始構有鵲巢其上鵲體
白黑雜色此羽蟲之孽又白黑祥也帝以問高堂隆對
曰詩云維鵲有巢維鳩居之今興起宮室而鵲來巢此

宮室未成身不得居之象也天戒若曰宮室未成將以他姓制御之不可不深慮也於是帝改容動色 又有

燕生巨鰈

苦候反

於衛國李蓋家形若鷹吻似燕此羽蟲

之孽又赤青也高堂隆曰此魏室之大異防鷹揚之臣於蕭牆之內其後宣帝起誅曹爽遂有魏室 景初末又集芳林園池已前再至輒有大喪帝惡之其年明帝崩

吳孫權赤烏元年以有赤烏之祥改元 十一年八月

白鳩見於章安 十二年四月有兩烏銜鵲墮東館權
使領丞相朱據燎鵲以祭按劉歆說此羽蟲之孽又黑
祥也視不明聽不聰之罰也是時權意溢德哀信讒好
殺二子將危將相俱殆覩妖不悟加之以燎昧道之甚
者也明年太子和廢魯王霸賜死朱據左遷陸議憂卒
是其應也東館典教之府鵲墮東館又天意乎 太元

二年正月封前太子和為南陽王遣之長沙有鵲巢其

帆檣

凡檣二音

和故官僚聞之皆憂慘以為檣木傾危非久

安之象是後果不得其死 孫亮建興二年十一月有
大鳥五見於春申吳人以為鳳凰明年改元為五鳳漢
桓帝時有五色大鳥司馬彪云政道衰缺無以致鳳乃
羽蟲孽耳孫亮未有德政孫峻驕暴方甚此與桓帝同
事也按瑞應圖大鳥似鳳而為孽者非一宜皆是也
孫休永安三年西陵言赤鳥見 六年白燕見於慈湖
赤雀見於豫章

晉武帝泰始四年八月有翟雉飛上閭闔門天戒若曰

閭闔門非雉所止猶殷宗雉登鼎耳之戒也 惠帝永
康元年趙王倫謀篡京師得異鳥莫能名倫使人持出
周旋城邑市以問人積日宮西有小兒見之遂自言曰
服留鳥翳持者即還白倫倫使更求又見之仍將入宮
密籠鳥并閉小兒戶中明日視之悉不見此羽蟲之孽時
趙王倫有目瘤之疾言服留者謂倫留將服其罪也尋
而倫誅 趙王倫篡位鵠入太極殿雉集東堂天戒若
曰太極東堂皆朝享聽政之所而鵠雉同日集之者趙

王倫不當居此位也詩云鵲之彊彊鶉之奔奔人之無
良我以為君其此之謂乎尋而倫滅孝懷帝永嘉元
年二月洛陽東北步廣里地陷有蒼白二色鶩出蒼者
飛翔冲天白者止焉此羽蟲之孽又黑白祥也董養曰
步廣周之狄泉盟會地也白者金色國之行也蒼為陰
象其可象言乎是後劉元海石勒相繼亂華明帝太
寧三年八月庚戌有大鳥二蒼黑色翼廣一丈四尺其
一集司徒府射而殺之其一集市北家人舍亦獲焉此

羽蟲之孽也又黑祥也及閏月戊子而帝崩後遂有蘇峻祖約之亂成帝咸和二年正月有五鷗鳥集殿庭北又白祥也是時庾亮苟違衆謀將召蘇峻有言不從之咎故白祥先見也三年二月峻果作亂宮殿焚毀化為汙萊

烏來二音

此其應也

咸康八年七月有白鷺集殿

屋是時康帝始即位不永之祥也後涉再朞而帝崩按劉向曰野鳥入處宮室將空此其應也海西初以興

寧三年二月即位有野雉集於相風此羽蟲之孽也尋

為桓溫所廢也 孝武帝太元十六年六月鵲巢太極
東頭鵠尾又巢國子學堂西頭十八年東宮始成十九
年正月鵲又巢其西門此殆與魏景初同占學堂風教
之所聚西頭又金行之祥及帝崩後安皇嗣位桓元遂
篡風教乃顏金行不競之象也 安帝雍熙三年龍驤

將軍朱猗

於離反

戍壽陽婢炊飯忽有羣烏集竈競來啄

噉婢驅逐不去有獵狗咋殺兩烏餘烏因共啄殺狗又
噉其肉唯餘骨存此亦羽蟲之孽又黑祥也明年六月

猗死此其應也

石虎饗羣臣於太武殿前有白鴈百餘集於馬道南
命射之無所獲太史令趙攬以為白鴈集庭宮室將
空 揚州送黃鵠雛五頸長一丈聲聞十餘里泛之
於元武池

宋孝武帝大明七年十一月大閱水師於中江有白雀
二集華蓋

梁武帝中大同元年邵陵王綸在南徐州坐廳事有野

鳥如戴數百飛屋梁上彈射不中俄頃失所在京房易
飛候曰野鳥入君室其邑虛君亡之他方後綸為湘東
王所齮竟致奔亡為西魏所殺

侯景在梁將受錫命陳脩物於庭有野鳥如山雀赤
紫集於冊書之上鵠鷗鳴於殿與中大同元年同占
景尋敗將亡入海中為羊鵠所殺

陳後主時蔣山有衆鳥鼓翼而鳴曰奈何帝京房易飛
候曰鳥鳴門闕如人音邑且亡蔣山吳之望也鳥於上

鳴吳邑空虛之象及陳亡建康為墟又陳未亡時有一足鳥集於殿庭以背畫地成文曰獨足上高臺盛草變成灰獨足者叔寶獨行無衆之應盛草成灰者陳政蕪穢被隋火德所焚除也叔寶至長安館於都水臺上高臺之義也

魏太武太延元年白燕集於盛樂舊都元鳥隨之以千數白雉三集於平陽太祖之廟

北齊孝昭帝即位之後有雉飛上御座占同中大同元

年又有鳥止於後園其色赤形似鴨而有九頭其年帝崩武成胡后生後主初有梟升后帳而鳴梟不孝之鳥不祥之應也後主嗣位胡后淫亂事彰遂幽后於北宮焉後主天統三年九月萬春鳥集仙都苑京房易飛候曰非常之鳥來宿於邑中邑有兵周師入鄴之應也武平七年有鸛巢太極殿又巢并州嘉陽殿雉集晉陽宮御坐獲之京房易飛候曰鳥無故巢居君門及殿屋上邑且虛其年國滅

北周靜帝大象二年二月有禿鶯集洛陽宮太極殿其
年帝崩後宮常虛

隋文帝開皇初梁主蕭琮新起後有鴻鳥集其帳隅未
幾琮入朝被留於長安梁國遂廢煬帝大業四年蜀
郡獲三足鳥八年帝征遼東次大垣見二大鳥高丈
餘鵠身朱足游泳自若上異之命工圖寫并立銘頌

十二年二月甲子夜有二大鳥似鵠飛入大業殿止於
御幄至明而去大業末京師宮室中恒有鴻鴈之類

無數翔集其間俄而長安不守 十三年十一月烏鵲巢帝帳幄驅不能止帝尋逢弒

唐高祖武德初隋將堯君素守蒲州有鵲巢其砲機

太宗貞觀十六年立晉王為太子雌雉集太極殿前雄雉集東宮顯德殿前太極三朝所會也帝以問褚遂良對曰昔秦文公時有童子化為雉雌者鳴於陳倉雄者鳴於南陽童子曰得雄者王得雌者霸文公遂以為寶雞祠漢光武得雄遂起南陽有四海陛下舊封秦王故

雄雉見秦地所以彰明德也上悅 十七年春齊王祐
為齊州刺史好畜鴨有鯉嚙鴨頭斷者四十餘 高宗
永徽四年宋州人蔡道基舍傍有獸高丈餘頭類羊一
角鹿形馬蹄牛尾五色有翅占曰鳥如畜形者有大兵
五年七月辛巳萬年宮有小鳥如雀生子大如鴟鳩
調露元年鳴鵲羣飛入塞相繼蔽野至二年正月還
復北飛至靈夏壯悉墮地而死視之皆無首 武后文
明後天下屢奏雌雞化為雄或半化者 中宗景龍四

年六月辛巳朔烏集太極殿梁驅之不去 元宗開元

十三年十一月戊子雄雉馴飛泰山齋宮內封禪所以
告成功祀事無重於此者而野鳥馴飛不忌禁衛不祥

二十五年四月濮州兩烏兩鵲兩鸛同巢隴州鵲
哺慈烏 二十八年四月庚辰慈烏巢宣政殿拱辛巳

又巢宣政殿拱 天寶十三載葉縣有鵲巢於車轍中
不巢木而巢地失其所也 肅宗至德二載三月安祿

山將武令珣圍南陽有鵲巢於城中砲機者三雛成乃

去 代宗大歷八年九月武功獲大鳥肉翅狐首四足
有爪長四尺餘毛赤如蝙蝠群鳥隨而噪之近羽蟲孽
也 十三年五月左羽林軍有鸛鵒乳鵒二 德宗貞
元四年三月中書省梧桐樹有鵲以泥為巢鵲巢知歲
次於羽蟲為有知今以泥露巢遇風雨壞矣是歲夏鄭
汴境內鳥皆群飛集魏博田緒淄青李納境樹木為城
高二三尺方十里緒惡而焚之信宿又然鳥口皆流血
九年春許州鵲哺烏雛 十年四月有大鳥飛集宮

中食雜骨數日獲之不食死六月辛未晦水鳥集左藏
庫七月懷州奏獲白鵲二 十一年二月同州進五色
鷹八月潞州進白鵲十一月潭州進赤鳥 十二年七
月河陽進鸛鵒二 十三年懷州鵲巢內有黃雀往
來哺食 十四年秋有異鳥色青類鳩鵲見於宋州郊
外所止之處群鳥翼衛朝夕唵稻粱以哺之睢陽人適
野聚觀者旬日 十八年六月鳥集徐州之滕縣唵柴
為城中有白鳥一碧鳥一 憲宗元和元年常州鵲巢

於平地 四年十二月群鳥夜集於太行山上 十三年春淄青府署及城中烏鵲互取其雛各以哺子更相搏擊不能禁 穆宗長慶元年六月鄆州奏雷澤縣界有烏巢因風墜二雛鵲引而哺之 敬宗寶歷元年十月丙申群鳥夜鳴 文宗開成元年閏五月丙戌烏集唐安寺逾月散崔集元法寺燕集蕭望之冢 二年三月真興門外鵲巢於古塚鵲巢知避歲而古占又以高下水旱今不巢於木而穴於塚不祥是秋突厥鳥自塞

北群飛入塞 五年六月有禿鶯群飛集禁苑鶯水鳥也 武宗會昌元年潞州長子有白頸烏與鵲鬪 宣

宗大中十年三月舒州吳塘堰有衆禽成巢闊七尺高一尺水禽山鳥無不馴狎中有如人面綠毛紺爪觜者其聲曰甘人謂之甘蟲占曰有鳥非常來宿于邑中國有兵人相食 懿宗咸通七年涇州靈臺百里戍有雀生鶯至大俱飛去京房易傳曰賊臣在國厥妖鶯生雀雀生鶯同說 十一年夏雉集河內縣署 咸通中吳

越有異鳥極大四目三足鳴山林其聲曰羅平占曰國
有兵人相食 僖宗乾符四年春廬江縣北鵲巢於地
六年夏鷓鴣雉集于偃師南樓及縣署劉向說野鳥入
處宮室將空 廣明元年春絳州翼城縣有鵲鷓鴣鳥群
飛集縣署衆鳥逐而噪之光啓元年二年復如之鵲鷓
一名訓狐 中和元年三月陳留有鳥變為鵲 二年
有鵲變為烏古者以烏卜軍之勝負烏變為鵲民從賊
之象鵲復變為烏賊復為民之象 三年新安縣吏家

捕得雉養之與雞馴月餘相與鬪死 四年臨淮漣水
民家鷹化為鵞而弗能游鷹以鷙而擊武臣象也鵞雖
毛羽清潔而飛不能遠無搏擊之用充庖厨而已 光
啓元年十二月陝州平陸集津山有雉二首向背而連
頸者棲集津倉廡後數月羣雉數百來鬪殺之 二年
正月閩鄉湖城野雉及鵞夜鳴七月中條山鵲焚其巢
京房易傳曰人君暴虐鳥焚其巢 三年十月慈州忤
城梟與鳩鬪相殺 昭宗光化二年幽州節度使劉仁

恭屠貝州去夜有鵲鷦鳥十數飛入帳中遂去復來

昭宗時有禿鷺鳥巢寢殿隅帝親射殺之 天復二年

帝在鳳翔十一月丁巳日南至夜驟風有鳥數千迄明
飛噪數日不止自車駕在岐常有鳥數萬棲殿前諸樹
岐人謂之神鴉 三年宣州有鳥如雉而大尾有火光
如散星集於戟門明日大火曹局皆盡惟兵械存

後唐明帝天成二年五月懷州進白鵲六月兗州進三
足鳥 廢帝清泰元年十月辛未巳時有雉金色自南

飛入中書止於政事堂屋脊上吏驅之不去良久飛入

於民家得之

其年李愚劉
响並罷相

後晉高祖天福八年三月有白鳥棲於作坊桐樹

後漢高祖乾祐三年五月太原進白鳥

後周太祖廣順三年六月河南河北諸州旬日內無鳥

既而聚澤潞之間山谷中集於林木壓樹枝皆折

是年
人疾

疫甚衆至顯德元年河東劉崇為
周師所敗伏尸血流故先萌其兆

世宗顯德元年二

月潞州高平縣有鵲巢於縣郭之南平地巢中七八雛

三年潁州進白鳥

宋太祖乾德六年西川兵馬都監張延通獻白鵲 太

宗太平興國五年七月祕書丞郭延釗獻紫鵲 九年

江陵獻綠鵲易州獻紅山鵲潁州獻白雉西京獻白鳩

至道元年四月知通利軍錢昭序獲赤鳥以獻上曰

鳥色正如渥丹正火德之應也貝州獻白鵲鵲越州獻

白鸛鵲九月京師自旦至酉群鳥百餘萬飛翔有聲如

風識者云突厥雀亦云蕃雀 真宗咸平二年八月黃

州群雞夜鳴至冬不止 太中祥符二年春昇州見黃
雀羣飛蔽日有從空墜者占主民有役事是歲火延州
天建節道場有禽素質脩毛赤味丹趾集壇側槐樹醮
罷方去是秋有禽白質丹味飛止禁中殿隅逐之至天
書殿而隱 三年三月禁中有禽止殿檻馴擾無畏宮
人以袂捧而獻采毛脩頸惟飲水不粒食 五年七月
乙酉建安軍鑄聖像所啓道場神雀五色脩尾黃喙集
塑像上九月庚辰復有神雀丹味黃腹背翅青綠集玉

皇殿幕馴擾不驚 六年十月代州五臺山有吉祥鳥
見形翅甚大其飛也四黃鳥導之四鵲從之泰山興工
有鳥狀烏味趾皆赤役夫稍憩即飛鳴作起之聲衆工
見其來畚鍤爭進將晡而去曰以為常目以為催工鳥

仁宗寶元元年二月乙酉興州長舉縣有鵲羽毛潔
白觜脚紅不類常鵲 英宗治平三年五月太子右贊

善大夫陳世脩獻白鳥 神宗熙寧七年六月乙未廣
州言增城縣鳳凰見 元豐三年八月戊寅趙州平棘

縣獲白鵲九月丙午趙州獲白鳥 六年七月壬申丹

州生白鵲 徽宗政和三年九月大饗明堂有鶴回翔

堂上明日又翔於上清宮是時所在言瑞鶴宰臣等表

賀不可勝紀 宣和元年九月戊午蔡京等表賀赤鳥

又賀白鵲 政和後禁苑多為林居野店又聚珍禽野

獸麋鹿鴛鴦禽鳥數百實其中至宣和間每秋風夜靜

禽鳥之音四徹宛若深山大澤陂野之間識者以為不

祥 宣和末南郊禮畢御郊宮端誠殿天未明百辟方

稱賀忽有鴉正鳴於殿屋若與贊拜聲相應和聞者駭之時已報女真背盟未踰月內禪明年有青城之難

高宗建炎三年上在揚州二月辛亥早朝有翠羽飛鳴行殿三匝一再止於宰臣汪伯彥朝冠冠者尊服飛鳥踐之不祥翠羽又青祥也劉向以為野鳥入宮室將空一曰敗亡之應是日敵兵入揚州有倉卒渡江之變後二十日伯彥罷相尋坐貶四年五月丁巳敵兵圍陝府鳶鴉數萬飛噪城上與戰聲相亂敵將羅索曰城當

臨急攻之遂失守近羽孽也 七年梟鳴於劉豫後苑
又群鳥鳴於內庭如曰休也豫惡之募人獲一梟者予
錢五千是歲豫廢偽齊亡 十七年二月有白鳥六集
於高禩壇上近羽孽也宰臣沈該以瑞奏 二十七年
饒州鄱陽縣有妖鳥鳬身雞尾長喙方足赤目上於民
屋數日彈矢不能中亦羽孽也 孝宗乾道六年邵武
軍泰寧縣有爵飛鳴立死於瑞寧佛刹香鼎先是紹興
初是邑有爵立死於丹霞佛刹之鼎皆羽孽也釋子因

釋其妖謂之雀化 寧宗慶元三年春池州銅陵縣駕
鵞雄化雌近羽孽也

文獻通考卷三百十二